

Ya piliwko no mitiliday a demak

Manengneng ko kaemangay masacefacefang makerih a malingad tayra i roma a niyaro' a misalama i, ma'inal aca masapa aca, ira ko ma:mang a kesem i faloco'. Maharateng iti:yaho, mitiliday ho kako i kocong sakatolo ko kongkoan no mako, saikoray to pitilid ako i kocong itiya, ma:lalokay a si'icelay kako a mitilid, ano miseking i, idahiay kako matama to ako ko pahofi no singsi, saka maolahay kako to singsi niyam, tadadimokos ko singsi niyam i takowanan.

Paka'ayaw no laheci a mitilid i kocong, mamiliwko kami mapolong tayra i Taypak misalama, tadakaolahan no mitiliday ko niya demak. “Aciyah! Ka'inalan kamo saw, haco:wa tayra miliwko misalama ko mako hani?” sa ko wina pasowal. “Nga'ayay mikihatiya kako miliwko ha ina? Tatayra maemin ko singsi ato cefang niyam yo!” han ako milicay ko wina, kaorira, halafin sa ko pitala ako awa ko cako niina.

Haharateng sa ko faloco' ako toniya sapisalamaaw a demak, cecay to a lipay i awa ho ko sowal no wina, rawod sa to ko saikoray a pipanganganan a romi'ad, “manikaw ko loma' samaamaanen i, awa ko sapa'aca to sapiliwkoaw iso.” sa to ko pacaof no wina. “Cecayay kako ko caka

pikihatiya a miliwko misalama ina, saheto tayraay a maemin ko cefang ako, mana pakacecay han kako.” Lekal han ko wina a milaliw a pata'angay to tangic.

Ano maketeketer a tatiitiih ko faloco' i, caka piroroh kako to wina ato wama, mafana'ay kako to roray no maliteng, saka caka pihai i takowanan i, iraay ko karawrawan no mira saan ko faloco', 'em'em han ko tatiih no faloco' a tayra kongkoan a mitilid.

Anini ta'angay to kako, maharateng ko itiyaay a piliwko no mitiliday a demak, tahalosa' ko faloco' a mararom to kanikaw no loma', ai:yay ko itiyaay a 'orip.

O 'icel no wina ato wama ko sakaira a mapatireng ko loma', o sakalatamdaw no niyam a malikaka tatolo, tadalimela ko wina ato wama i tamiyanan, limela a midipot kami to malitengay niyam tahada'oc.

難圓的夢

遇到學生旅行的羨慕與淡淡的憂傷。回憶起自己國中三年級時，作者努力學習，成績優異，受到師長的喜愛。在畢業旅行前，懇求母親讓自己參加，但最終未能如願，得知無法參加時感到非常傷心。儘管如此，並沒有責怪父母，因為理解他們當時的生活困難。父母辛苦養活家庭，展現了對子女的愛，也因此更加珍惜和照顧自己的父母。